

Allanut ajunngitsuliorneq inuiaqatigiinnik kivitseqataaneq, utertitsiffigineqarnissamik akissarsinissamilluunniit siunertaqanngitsoq, inooriaatsitsinni annertunerujussuarmik ileqquliuteqqittariaqarnerata qanoq iliornikkut aaqqissuussamik piviusunngortinneqarsinnaanera pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Vivian Motzfeldt, Siumut)

Saqqummiussineq

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisunut Ilaasortaq)

Nammineq piumassutsimik ingerlatsisarneq uagutsinni inuiaqatigiinni isumalluutaavoq aalajangiisuulluinnartoq pinngitsoorneqarsinnaanngitsorlu. Nuannaarutigaaralu Inatsisartunut ilaasortap tamanna oqallisissanngortimmagu.

Kattuffiit nammineq piumassutsimik ingerlanneqartut inuillu ataasiakkaat suliniutigisartagaat inuiaqatigiinni pingaaruteqartumik inissisimapput, ataatsimullu isigalugu inuiaqatigiinni innuttaasut affaasa missaat namminneq piumassutsiminnik ikiuuttarput, timersoqatigiiffinniuppat, politikikkut kattuffiuppat, peqatigiiffinni aamma NGO-ni il.il. Nammineq piumassutsimik ingerlatsisartuuneq pissusissamisuginnartut isigeqqajaasarpaput, kisiannili nammineq piumassutsimik ingerlatsisoqarnera aalluttuagassaavoq.

Nammineq piumassutsimik ingerlatsinerup aningaasanut inatsisikkut tapiiffigineqarsinnaaneranut qinnuteqartoqarsinnaasarpog. Taamaalillutalu suleqatigiinnitsinni aaqqissuulluakkamik tunngaveqarpugut, nammineq piumassutsimik ingerlanneqartumik peqatigiiffiit kattuffiillu naalakkersuineramik suliaqartunit pisortat ingerlatsineranniit akuliuffigineqannginnissaannik tassanilu illuatungeriit imminnut atorfissaqartinnerannik tunngaveqartumik aaqqissuussisoqarluni.

Pisariaqartinneqarpoq suleqatigiinnernik ingerlatsinerni ataavarnersussanik aaqqissuussisoqarnissaa, aammalu najukkani ataasiakkaani attavigeqatigiittartut peqatigiiffinnut kattuffinnullu nammineq piumassutsimik ingerlanneqartunut suleqatigiinnernik aaqqissuussinissaat. Suliffeqarfiit najukkani ataasiakkaani inuiaqatigiinni akisussaaqataanermik annertusaanissani peqataarusupput, CSR –imi politikki iluaqutigalugu, pisortallu ingerlatsiviini kissaatigineqarpoq innuttaasunut pitsaanagerusunik neqeroorutissaqalernissaq, ataatsimoorussanillu ingerlatsinernut annertunerusutigut tunniussassaqalernissaq. Kikkut tamarmik nukissanik suleqatissanillu pisariaqartitsipput. Kikkut tamarmik iluaqutissaraat qiimmassarneqarnissamik, tigussaasutigut ikiorserneqartarnissamik, piginnaanernik suleqatissaqarnerlu.

Assersuutissaalluarporlu uagut nunatsinniit Issittormiut unammiaartarnerini – Arctic Winter Games-ini – peqataasarnerput. Aaqqissuussineq taanna nalissaqanngitsuusammik nammineq piumassutsiminnik ingerlatsisut, namminersorlutik inuussutissarsiortut, kommunit, issittumi nunat immikkoortuisa nunallu nammineq akornanni suleqatigiinneruvoq, inuttut naleqassutsimik annertusaanissamik, kulturikkut, isumassoqatigiinnikkut nuannersumik misigisaqartitsisarlu inuiaqatigiillu akornanni attaveqatigiinnernik nukittorsaasuulluni. Nunatsinni Timersoqatigiit Kattuffiat aamma AWG 2016 ukiuni makkunani suleqatigiipput nunarput tamaat isigalugu nammineq piumassutsimik ingerlatsineq nukittorsarniarlugu.

Uagut atugarissaarnermik atuisutut inuiaqatigiinni ataatsimoortuni inooqataanermut isummersoqataasariaqarpugut, aammalu inuiaqatigiinni ataatsimoorluni ingerlatsinermi immikkut pisariaqartitatsinnik iliuseqartarluta.

Apeqquteqaat aallaavigalugu oqallinnissamut matumunnga qilanaarpunga, ilaasortallu saqummiussugaat soqutigalugit malinnaaffigissavakka.